


北京圖書館出版社

福建師範大學圖書館藏
稀見方志叢刊



方寶川
陳旭東◎主編

福建師範大學圖書館藏
稀見方志叢刊

方寶川

陳旭東◎主編

7

北京圖書館出版社


長樂縣誌卷之六

知長樂縣事永郡夏允



崇教誌

志崇教者七日學較日學器書院日射圃日學田日射學



學較

序曰習業有所百工且然況士乎

國朝右文崇道學宮之建所在翼然觀于長邑旣巍
旣炳將令士群而習焉周旋磬折絃管豆登洋洋其
間得時比而糾其不率也長邑之士至七百餘人美
哉濟濟其亦有至泮宮而群肄者乎余將爲多士日
課之

學在縣治南五十步許創自唐乾符四年宋慶曆
中廟學傾圯歷年繕治弗就元祐三年縣令袁
正規亟議脩建邑人林通作縣圖經貿錢二十
萬贊襄其事富民相與資助之新宣聖殿及殿
後堂堂之兩序十二齋崇寧初增置五十三區
元至正中復頽圯儒生林文壽等重建宣聖
廟易其額曰大成殿洪武十五年知縣丘宗亮
如制鼎建殿堂齋舍燦然具備永樂中兩廡之
背各建一軒扁曰朝陽瑞榕訓導林慈爲記曰
長樂邑學之西偏有古柳一株高二丈許忽榕

子寄生其巔歲月旣久柳日衰而榕日長恍然
若有鬼神培植之者柳之榦卒爲榕廬所包焉
時有識者見而美之以爲諸生登第之兆于時
吾黨士子樂聞其言而識之厥後三年大比陳
生全計偕京師廷試果爲榜眼又三年馬生鐸
廷試狀元名振天下其領鄉薦中甲榜者難一
二計諸庠生始悟曩者之言爲有徵於是相與
名其軒曰瑞榕請余文以記之余曰傳不云乎
善之將至有開必先降時雨山川出雲物之
瑞事之徵也况賢者懷材抱藝乘時而奮感風

雲依日月爲邦家太平之基則瑞之兆也固宜
抑嘗稽諸航乘在昔唐季時民有崇信大雄氏
建造南山寶塔成金碧岩堯有登而嘆曰此佳
識也官筍生矣吾邑公卿文士繇茲而盛後果
如其言今瑞榕視官筍識爲尤佳矣吾黨後生
誠能追前人逸駕勵志懋學以奮發乎文章吾
知其敷對 大廷禮樂三千狀頭及第之選非
吳航庠諸髦俊之屬而誰屬余雖老矣尙當傾
耳以聽拭目以觀焉 天順中知縣任衡重修
廟學成化中知縣羅敘撤明倫堂而葺之弘治

辛酉知縣王渙重脩

邑人參議
陳潭記

學以儒名遵儒

道也群士于學業儒術也儒之道所以範世紀

俗植人極造斯民天地萬物舉賴是而安者也

外此則異端小技君子有弗事焉者矣士而講

訓詁組文詞爲釣名媒利計已非國家待用

之意矧槩習業于家遷奪外務荒惑心志於學

制殆若虛設然烏乎其可長樂古名邑學在縣

治南距百步許創自有宋元祐間而我朝因

之夫何地址淺隘規制限陋至校官住生舍而

弟子員僦居民屋兼之地敝相仍幾就荒落弘

治戊午象山王侯渙以進士令茲邑曰學廢不脩今之責也隨葺講堂尋建櫺星門以歲儉費窮輟工以待歲辛酉御史陸公亦以學敝不足庇士令較官具脩理狀而檄有司爲之明年王侯考最還任曰此吾夙志也于是脩兩廡次戟門次學門次生徒號舍及內外周垣敝者治之缺者完之暗者鏤飾之壞且甚者畢徹而更作之復購東偏民地若干步南向爲屋三楹以廣教諭公廨西向爲屋二區區各六間以爲訓導公廨戟門之東立鄉賢祠旁隙地爲倉屋凡布

畫位置曰必方必正毋令他日改爲也度工量
材曰必堅必緻毋煩後日更作也諸役與費悉
出於官而一不以擾民經始于土年五月畢工
于今年之三月繇是講誦有所激勸有所舉百
數年積敝不匝歲而一新之侯之功何大且速
哉諸生曰侯爲善政以活我民又爲此學以嘉
惠我士子不可使厥功德無傳于時教諭潘君
援貳教鄭君諤方君彰以記筆屬予且欲勵諸
後人於戲侯德若功已識于人口而鐫于民心
奚以文字爲哉蓋侯以名儒吏民故無人無我

處官猶家而成功裕如也使爲政皆心侯之心
何以事功不立爲患哉雖然爲國育才有司
職也積學待用學者事也儒先謂宇宙間事皆
吾分內民物之責有身則有之雖吾分有與焉
與否顧上之所以養我而待於我者在我之
所以爲學而求副乎上之所以待者在是使惟
棹筆墨徼利達而實無益於民與物甚者又從
而戕之國家積歲而敎其所望於我者何如
而顧以是應則奚貴乎立學較養士爲哉長樂
人才素爲吾閩冠先哲之茂德偉功足爲邦人

勸者具列鄉賢祠永樂間陳公全登榜眼第馬
公鐸李公騏相繼登狀元第自後掇危科躋膺
仕以儒術效于世者後先相望今學改舊觀士
氣益振凡游斯歌斯者必磨刮奮勵與前哲爭
高期無負於 聖朝建學之意與賢有司興學
之心可也苟徒趨逐時好務浮誇而乏實用不
知於 國家教學之意何如正德十四年災御
史沈灼檄知縣曹鑑更建中爲 聖殿翼以兩
廡其南爲戟門又其南爲櫺星門門內鑿泮池
而橋其上嘉靖初奉制改大成殿爲先師廟建

啓聖祠在殿之東祠前建敬一亭亭前鄉賢名
宦二祠廟之西爲明倫堂附堂二廡爲兩齋東
曰居仁西曰繇義西齋之旁有會膳堂東西號
舍各五間其前儀門又其前爲儒學門倉房神
厨在儀門右教諭廨在敬一亭左又購民地拓
建訓導廨二所一在教諭廨之左一在儀門外
之右並有廳及寢室各三間櫺星門之東偏有
牌坊舊扁泮宮嘉靖二十四年教諭劉洙潤闢
路往來名賢路四十年殿之戟門將圯知縣戴
時望復重創焉學前向苦民居蔽射司馬陳省

嘗欲捐金去之萬曆四十三年知縣萬編與教諭袁文紹始定界拓屏門于櫺星門外周坦方整形勢軒豁少司空董應舉爲文記之曰樂之人文昔蓋冠於吾郡蓋其風俗禮讓儉勤敦篤廉耻之教不替於先民學士大夫相觀相摩束身若處子毋敢軼越故教成而俗美士慤而文興彬彬大魁名卿貞標亮節相踵于前後其教使之然也其後浸不如前或者歸之學宮之形勝變易夫形勝之說誠有之然其興壞得失亦若與風教相乘其興而壞壞而興必皆有人焉

爲之而氣運亦隨以轉若天有以使之然者吾
嘗與樂之人士游考覽學圖推其所以得失之
故蓋溪東蝕而路斜飛水旣反跳而學前民屋
蔽射皆非昔日之舊其故蓋難言之司馬陳公
省持士論歷請當道脩改袖金爲資莫克復舊
郡守喻同守鄧先後親勘大不利於陳李二家
李願受金折屋去學之蔽矣獨陳憤加侵地之
名於其父大與諸生爲難不得解時司馬亦捐
館事幾寢起部蔣公奮曰斯非關通邑文運而
吾敢憚力遂白督學馮公集合同志李公庭模

以署邑唐侯所丈界刻日拆正於是學中矢射
反跳虧蔽之害始去十七八而蔣幾見螫會萬
侯至毅然圖成割溪歸學標以界石復橋于巽
鎖水偃流與掌教袁公文紹極力從事追尋舊
制叅厥新規設屏門于櫺星門外垣于學門坊
于廣術軒豁帶抱實壯前觀又欲濬流引邑前
水與東溪合興作捐助計不全勝不已諸生懽
咏鼓舞請刻圖於石垂示永求而求記於予予
向謂形勝之說與風教相乘觀諸生士大夫今
日之意氣或庶幾乎作之仁侯協以良傳若天

奏其會以大昌斯文者復往昔名卿大魁之盛
將於是不佞無詞以贊敬陳師友腐語用
規于多士曰聖有完學請復其心宗廟百官之
富美皆在是毋令蝕焉不如數仞之宮墻也

萬編碑陰記

儒學在縣治東南首癸趾丁左爲聖

殿右爲明倫堂制獨異于他邑其堂宇廨署仍
舊貫者不具論論其新闢者櫺星門舊制視儒
學門稍却今移前數武與之竝峙偶以颶風剝
落隨重建焉門以內左爲賢路右爲儒門賢路
之左爲名宦鄉賢祠祠無藩屏似在宮墻之外

今垣而居中泮池舊在櫺檻內今議改明倫堂
前與聖殿相衿帶掌教與東齋廨向無便門
俱從大殿出入今新闢於名宦鄉賢之前殿前
建大成坊一座列以賁庸以禦東屋之飛射外
列兩坊左曰翔龍右曰起鳳南有隙地濶六丈
深二丈五尺介在陳李二家之間皆學宮址也
扶闌而闢之復達道橋于巽方引溪水注下爲
龍門池水不欲其直出爲牆以控之題曰鯢化
池繇內河涯江河岸俱係新濬較往昔倍濶議
者猶欲加濬令可通舟楫引馬江之水達于泮